


蜀中名勝記

卷  
自二十四  
至二十七

風陵文庫  
文庫19  
F 70  
6



蜀中名勝記卷之二十四

閬中曹學佺能始著

川北道

保甯府一 閬中縣附郭

閬中本秦舊縣張儀伐蜀所置通志云張儀城在城東二十里郡志云閬中縣東二十里白沙鎮是舊縣治 國初徙入城按此則張儀城即舊縣矣通志云本府城漢末劉璋所築蜀漢巴西守張飛治此增修國初千戶勝貴拓之甃以石是前郡縣不同城也寰宇記云張飛冢在刺史大廳東二十步高一丈九尺

風陵書屋藏本  
澤田瑞穂

碑目間中有張桓侯與張遼書石刻漢文八分書  
方輿勝覽云唐魯王靈夔勝王元嬰皆鎮是州以衙  
宇卑陋遂修飾宏大之擬于宮苑謂之隆苑其後避  
明皇諱改曰閬苑又云或謂閬苑仙有五城十二樓  
向但有五城而樓尙闕宋德之爲守乃建碧玉樓于  
衙城之西南隅亦名十二樓以成閬苑之勝按杜甫  
詩嘉陵江色何所似石黛碧玉相因依樓名取此  
通志云東樓跨府城上形製尙古杜詩層城有高樓  
制古丹雘存迢迢百餘尺豁達開四門 勝覽云閬  
州江山奇秀聞天下直前據其會曰南樓唐滕王元

嬰所建也宋太守李獻卿詩云三面江光指城郭四  
圍山勢領烟霞馬鞍嶺上渾如錦繖蓋門前半是花  
通志云會經樓在府治將相坊按華陽國志云巴  
有將蜀有相後因有閬苑三學士錦屏三狀元之盛  
故以將相名之樓元祐中建置經史子集三萬餘卷  
蘇軾題額蒲宗孟記 勝覽云整暇堂在府治黃魯  
直記又云治平園宋治平初太守朱壽昌築于牙城  
東文與可嘗爲賦十絕其錦屏閣詩云茂林斑若錦  
秀巘矗如屏底處供登覽闌干在杳冥清風臺云無  
地來見襲有地更臨高坐客清談起紛紛落塵毛四

照亭云畫箔褰何礙珍叢發已圓願公皆遍賞莫爲  
一隅偏柳橋云接風誇晚態垂雨怯春寒爲問題芳  
意同誰倚畫欄曲池云水似珠璫入池如玉磬開臨  
流唯自適魚鳥莫相猜明月臺云微稜生海角圓魄  
到天心共上惟佳客無容照俗襟三角亭云合棟交  
生角迴欄互引牙由來因地勢不是故尖斜花塢云  
繚繞穿紅萼爛斑踏紫苔誰將錦步障端爲使君開  
藥欄云玉笋齊抽日金缸競列時自然俱可愛莫放  
畫簾垂郎中庵云已築環爲堵仍裁月作床公來時  
隱几身世在羲皇按通志名宦載壽昌治閭有異政

寰宇記云閬中山其山四合于郡故曰閬中名山  
志云閬中山多仙聖遊集之所志云卽錦屏山在城  
外嘉陵江南與郡治相對兩峰壁立如屏又名寶鞍  
山方輿云山上有瑪瑙寺羅漢畫錦西橋三院後又  
築閬峰亭以眺望焉宋陸游詩城中飛閣連危亭處  
處軒窗對錦屏涉江親到錦屏上却對城郭如丹青  
喻汝礪詩暝色輕烟罩郡城漁舟燈火倒觀星塞山  
遠水江村暮自在粧成水墨屏按古咸安志火井令  
袁天綱題云此山磨滅英靈乃絕其下爲海棠溪多  
海棠唐張元寶詩寒食清明倍惘然海棠風落小花

細如今獨有孤魂在半落嘉陵半錦川 李膺益州  
記云閬中盤龍山南有一石長四十丈高五尺當中  
有戶有門若人之掩閉古老以爲玉女房通志云在  
城東三里望如蟠龍之狀後魏盤龍郡以此山名唐  
貞觀中候氣者言西南千里外有王氣太宗令人入  
蜀次閬中果見山氣蒸蔚後鑿破山脈水流如血今  
號鋸山咸亨初曾徙閬中縣于此卽今之鋸山關也  
志又云蟠龍山前袁天綱嘗築臺于此以占天象  
寰宇記云仙穴山在縣東北十里周地圖云靈山峰  
多雜樹昔蜀王驚靈登此因名靈山山東南隅有玉

女擣練石頂有泉常清冽洞穴懸絕微有一小徑  
天寶六年勅改爲仙穴山志云一峰峭拔介宋江嘉  
陵之間上有驚靈墓元稹八月六日與僧如展前松  
滋至簿章戴同遊碧澗寺賦得扉字引云寺臨蜀江  
內有碧澗穿注兩廊又有龍女洞能興雲雨詩中噴  
字以平聲韻詩云空澗長江礙鐵圍高低竹樹倚巖  
扉穿廊玉澗噴紅旭湧塔金輪接翠微草引風輕馴  
虎睡洞驅雲入毒龍歸他生莫忘靈山別滿壁人名  
後會稀 玉臺山在城北七里杜詩閬中城北玉臺  
山有滕王亭杜詩君王臺榭枕巴山萬丈仙梯尙可

攀卽此地後有滕王墓右碑云闔之第四景爲願神石洞洞虛雙拱密邇玉臺昔滕王建亭于此古人詩文隱隱可辨 勝覽云東巖在城東有寺鑿山爲巖西巖在城西有奪錦亭與錦屏山相對陸務觀詩奪錦軒中醉倚欄錦屏蒼翠插雲端平生不喜言爭奪付與游人自在看 南巖在城南有大像山乃唐高士安隱居之所志云一名臺星巖陳堯叟兄弟讀書于此有捧研亭輿地碑目云天聖九年本路運使司馬池來遊子光侍末云君實捧硯勾龍亶請以捧研名亭 北巖在城北有繖蓋山高僧宣什住持乃

城中開元寺衲也謂之東寺卽元稹題樂天詩于壁及文同寄詠澤師竹軒處是什公博通經典魯王出鎮表而異之後居繖子山山上無水以杖叩巖浩然泉湧今爲卓錫泉 喻汝礪漱玉巖記云自古常言天不負人吾初不甚信曩游太學不啻六千三百日如古所謂屈原賈誼揚雄韓愈柳宗元輩亦頗識其面目及得一第則枯冷羞澁幾笑破人口比來闔中持手板謁上官奔走匍匐作主簿少府模樣燕居作樂則搖口吻弄語言以佞貴人而覓所謂舉狀者嗟乎其局促如此則天果不負人邪然飽聞闔奇山川

而賢士大夫最多亦復把酒自慰一日登錦屏挈舟嘉陵江步至占星巖徘徊縱觀倚老松卧怪石往往摩腹一笑然是三境之遊須廢吾一日糧吾不得與女旦暮相從也惟母丘氏漱玉巖近在牆壁外乘興步履從小奚奴直謁主人脫衣散髮坐巖腹酌酒賦詩相與作物外笑樂酒醉發狂即呼天大叫曰天乎真不負喻汝礪矣吾嘗謂富貴之士不能放意于江山松竹之樂而山川怪竒烟雲竹石詩酒風月唯遺逸未遇之人始得兼而有之故天地間雄偉不凡之處天所以資賢人而舒其憂愁之思者也吾零落荒

山鬱鬱無聊賴有錦屏嘉陵之雄偉占星漱玉之勝槩所謂聞之四竒者吾皆得而有之他日解官視吾破囊無復新井縣一物驅老髯獨負四物以歸朋游故舊從吾覓聞中土物吾則與之飲酒取吾詩而歌之則是四景者不移足而在几席間矣 通志云文城山在城東三十里峰巒聳列林木蔥蒨一峰拔出名玄都壇張道陵授符籙之所 寰宇記云天目山在治東界一名天溪洞葛仙公修道之所赤烏七年勅置集靈觀先天二年改爲天目觀中和二年改名福唐觀郡志云天目山在城東五十里唐杜光庭詩

盤空躡翠到山巔竹殿雲樓勢逼天古洞草深微有  
路舊碑文滅不知年入州物象分簷外萬里烟霞在  
目前自是人閒輕舉地何須蓬島訪真仙又云曾隨  
雲水此山遊行盡層峰更上樓九日登臨須有意七  
年歧路亦堪愁樹紅樹碧高低影烟淡烟濃遠近秋  
暫爇爐香不須去佗倍天仗入神州 寰宇記云嘉  
陵水一名西漢水又名閬中水周地圖云水源出秦  
州嘉陵因名嘉陵經閬中即閬中水又云閬中水亦  
曰渝水譙周三巴記云閬中有渝水實銳氣喜舞漢  
高祖樂其猛銳數觀其舞使樂人習之所謂巴渝舞

也路史云太昊伏羲氏母華胥居于華胥之渚孕十  
有二歲而降神生于仇彛長于起城註云所都國有  
華胥之淵乃閬中渝水地也 通志云宋江源出漢  
中府舊廉縣經蒼溪縣東流入嘉陵有白水源出漢  
州亂山中至昭化縣北合嘉陵唐鄭谷詩蒼蒼白水  
下嘉陵是也漢地理志縣有彭道將池東西二里南  
北約五里文緯書識云巴西郡治有彭池大澤四彛  
述云城西南十里有郭池周約五十畝勝覽云彭池  
即今之南池也郭池即魚池也二地與漢志相符通  
甲開山圖註云仇彛山四面絕立與彭池成紀皆西



土是伏羲生處仇彛卽仇池成起卽成紀二字通用  
南池有漢高祖廟杜詩崢嶸巴閬間所向盡山谷  
安知有蒼池萬頃浸坤軸劍南詩藁云唐長慶中南  
池新亭碑在漢高帝廟側 寰宇記云零星池在縣  
西北四里益部耆舊傳趙瑤爲閬中令時西州遭旱  
瑤率掾吏齋戒于零星池歸咎自責稽首流血應時  
大雨 侯鯖錄云閬州有三雅池昔有人于此池得  
三銅器狀如杯蓋上各有篆字一曰伯雅二曰仲雅  
三曰季雅按魏文典論云靈帝末斗酒直萬金劉表  
一子好飲乃製三爵大曰伯雅注一斗次曰仲雅注

七升小曰季雅注五升今池所得乃劉氏酒器也  
通志云城東北廿里有譙元廟漢書元字君黃閬中  
人少好學能談春秋成帝時拜議郎歷奉谷令後舉  
繡衣使者王莽居攝易姓名竄歸公孫述僭號連聘  
不起予毒藥將服之其子瑛盡捐家貲錢贖建武十  
一年卒光武敕所在還玄家財策詔本郡祠以中牢  
古碑云汝南令神道闕在閬中縣未著人代郡守  
張晦辨云於東面得隸字十有三闕不可識有七  
輿地紀勝云唐貞觀碑在閬州太霄觀其石光瑩前  
後可鑿號透明碑 本志唐漢州刺史房琯墓碑在

縣城外杜詩他鄉復行役駐馬別孤墳近淚無乾土  
低空有斷雲 碑目云唐道龔墓碑在城中報恩寺  
按蜀檣杙王建以道龔爲閬中刺史改其鄉爲烈士  
鄉 又云崔善德政碑在衙門東按善武成中爲刺  
史有惠政民人懷之

蒼溪縣

蒼溪于閬中爲上游卽臨嘉陵水也江岍有放船亭  
杜詩送客蒼溪縣山寒雨不開只愁騎馬滑故作放  
船回後人因以名亭 元稹蒼溪縣寄揚州兄弟詩  
蒼溪縣下嘉陵水入峽穿江到海流憑仗鯉魚將遠

信鴈回時節到揚州劉滄宿蒼谿館詩孤館門開對  
碧岑竹窗燈下聽猿吟巴山夜雨別離夢秦塞舊山  
迢遞心滿地莓苔生近水幾株楊柳自成陰空思知  
己隔雲嶺鄉路獨歸春草深文同小泊蒼溪山寺詩  
正午風色高遂泊蒼溪縣層崖抱林木有寺藏蔥蒨  
出船步危磴蔭密頗縈轉上到金僊家緣空列臺殿  
修篁掛懸流坐覺炎暑變老僧晚經論言語何穿貫  
引我上高閣闌干俯江面寥寥百里內山水盡奇觀  
誰謂羈旅中所見皆所願汀洲百鳥聚井邑清烟散  
樂此暮忘歸踈鐘起岩畔徙倚下松門尙怪舟人喚

舊治在曲肘川去縣一里後周所設也源出玉女  
山東南流入嘉陵江曲折如肘其近山有小錦屏  
與錦屏相似其稍遠者縣南三十里爲大獲山天池  
浸其中宋江環遶其下石城四周淳祐間余玠徙閬  
州治于此又治之東八十五里有方山遠望如几案  
古方州城也宋嚴大猷居此因以方山名集其  
著者東南三十五里有雲臺山寰宇記云一名天柱  
山高四百丈上方百里有魚池宜五穀無惡毒可度  
灾周地圖云漢末張道陵在此學道使弟子王長趙  
昇投身絕壑以取仙桃長等七試已訖九丹遂成郡

國志曰雲臺山天柱巖下有一桃樹高五尺皮是桃  
心內似柏張道陵與王良趙昇試法于此樹四百餘  
年不朽小碑記之志云山有洞四曰麻姑芙蓉平仙  
峻仙巖二曰松根蟠桃池二曰浴丹玉魚山多榕柏  
大者空中可坐數人道經云永壽二年重九日道陵  
將諸品祕籙斬邪二劍玉冊玉印授其長子衡乃與  
夫人雍氏登峰絕頂白日昇天時百二十三歲晉顧  
長康畫雲臺山記見畫苑碑目云唐元稹謫通州司  
馬曾遊雲臺山書行紀於山之鐘樓枋上宋之間送  
田道士使蜀投龍詩云風颭忽冷然雲臺路幾千蜀

門峰勢斷巴字水形連人隔壺中地龍遊洞裏天願  
言迴馭日圖畫彼山川馬戴寄雲臺觀田秀才云雪  
壓松枝拂石窻幽人獨坐鶴成雙晚來漱齒敲冰渚  
閒讀僊書倚翠幢宋祁西州猥稟云予昔遊雲臺觀  
謁希夷先生陳搏祠堂緬想其人今追作此詩仙館  
三峰下年華百歲中夢休孤蝶往蛻在一蟬空藥笈  
微言秘霄晨浩氣通丹遺舐後鼎林遣御餘風市霧  
沉荒白飡霞委暗紅岷峨有歸約飛步與誰同元廖  
寥蜀望詩雲臺突出眾山低小徑縈紆上石梯古寺  
獨存人寂寂斷碑惟覆草萋萋滿空香散春蘭綻萬

壑烟生曉樹迷爲愛其間風景好登臨幾度杖青藜  
志云蒼溪王簿金極治道得石塚遺骸尙存有石銘  
云歲月不須論車塵擁石門若逢金王簿移我上高  
原迺改葬之相沿爲金王簿墓不著年代

南部縣

南部本充國地漢末徙巴西郡于閬中有充國城在  
焉寰宇記云卽今新井縣東北二十八里充國故城  
是也李雄亂後荒廢唐書趙彥昭舉進士少豪邁  
風骨秀爽嘗調南部尉與郭元振薛稷善往來吟詠  
不絕新井西水二廢縣皆接閬中通志云西水河

在南部三十五里源出龍州後周西水縣以此名也  
勝覽云蘭登山在新井縣東二十里相傳嚴君平  
隱居于此有朝遊蓬漢暮宿蘭登之句三面峻絕俯  
臨西江 本志唐開元中何渙爲殿中侍御史知名  
家于西水明皇賜其鄉爲柏臺鄉 又云新井縣有  
二龍里唐任暉任疇之所居也姚合送任暉及第歸  
蜀詩子規啼欲死君聽固無愁闕下聲名出鄉中意  
氣遊東川橫劍閣南斗近刀州神聖題前字千人看  
不休 有巖曰靈雲唐蒲景珣家于此岩前爲居室  
至者不知其爲巖也在蟠龍山下有洞人入之履地

作鐘聲李燾詩云路轉層岡十里餘武陵傳者亦難  
如昔年煉藥仙人室今日餐霞道士居洞外蟠桃開  
錦繡巖前石榴漱瓊琚猗與靈氣爲時雨可惜圖經  
闕不書 有樓曰清風宋蒲宗孟左丞建其家多書  
叙此樓以貯之嘗作訓戒子弟曰寒可無衣饑可無  
食書不可一日失 有院曰慈光寇平仲過新井慈  
光院看海棠詩云暄風花雜滿欄香盡日幽吟歎異  
常翻笑牡丹虛得地玉階開落對君王 縣東南與  
蓬州相接三十里爲禹跡山志云禹治水所經也山  
頂平行有小石泉鑿石爲像層樓覆之宋紹興間何

汝賢有禹跡山院記 五十里爲離堆山卽古新政  
縣地蜀三離堆之一也唐顏真卿謫蓬州長史來遊  
作磨崖記謂此山斗入嘉陵江直上數百尺形勝縮  
矗上崢嶸而下洄洑不與眾山相聯屬故曰離堆志  
云東西有石堂故京兆尹鮮于仲通與弟叔明所鑿  
堂北有盤石石上有九曲流杯池 歐陽修集古錄  
云新政縣磨崖記唐顏真卿撰併書以寶應年立碑  
有魯公祠宋馬存記云上元中顏真卿爲建州長史  
過新政作離堆記四百餘言書而刻之石壁上字徑  
三寸雖崩壞剝裂之餘而典型俱在使人凜然元符

三年予友彊叔來尹是邑始爲公作祠堂于其側求  
予文以爲記 輿地紀勝云新政縣大厯碑在江岸  
之次顏魯公書碑傍有佛老子像像傍又有二小  
記皆大厯中物按此所謂三教院也碑目云鮮于氏  
兩神道碑一在三教院崖上一在墓田其文與書皆  
出顏魯公又有獎諭仲通碑亦在墓田 志云新政  
縣十里對江報本院鮮于仲通叔明兄弟葬其傍有  
韓雲卿所撰墓碑猶存其字儼然無剥落 按鮮于  
之後宋時皆家于此景祐間鮮于侁登第爲轉運判  
官值行新法而民不擾司馬溫公稱之曰子駿福星

也又有十世孫元卿同知縣范百祿州掾任昱觀魯  
公刻題名 其與離堆相近曰仙鳳山志云在縣南  
五十里上有七曲臺始落成時地上土痕成仙鳳二  
字大數丈 碑目云宋新政令裴迺唐丞相晉公之  
後也因家于此尙收得晉公像及累任告身自撰真  
贊並存

廣元縣

廣元蜀口古今所必爭之地宋甯武軍志云前接關  
表後據劍門烏奴山祠堂記云郡壤故錯羌氏與上  
庸百濮微髡彭盧俱寔一大都會也元改爲廣元路

碑云在易曰廣大配天地在春秋謂一爲元以示張  
大之意 縣治在烏奴山東晉壽綿谷二縣皆其處  
志云烏奴山一名烏龍山在廣元西二里嘉陵江岍  
峭壁如削有洞不可上昔李烏奴于此修寺因名  
按北史王元邈傳亡命李烏奴作亂梁部陷白馬戍  
元邈率東從七八百人討之不克慮不自保乃使人  
僞降烏奴告之曰王使君兵眾羸弱棄伎妾于城內  
携愛妾二人去已數日矣烏奴喜輕兵襲州城元邈  
設伏擊破之烏奴挺身走太祖聞之曰元邈果不負  
吾意遇也此烏奴之始矣 今之臨清門川王廟即

唐皇澤寺也九域志云利州都督武士護生武后于此因賜寺刻其真容李商隱利州江潭詩註感孕金輪乃武則天事也詩云神劍飛來不是銷碧潭珍重駐蘭橈自携明月移燈疾欲就行雲散錦遙河伯軒牕通貝闕水宮帷箔卷冰綃他時燕脯無人寄雨滿空城蕙葉彫葢后母感漑龍而有孕也 縣北卽黎州城梁大同置後魏之益州隋之義成郡皆理于此宋唐庚詩黎州酒貴如金汁解盡寒衣纜一吸 南有刀環山益州記曰葭萌縣南十里有刀環山赤銅水出焉 東卽望鄉臺去縣三里武元衡送柳郎中

詩望鄉臺下秦人去 其見諸經傳者曰嶓冢山原爲漾水卽西漢水也曰潛水出綿谷之龍門山禹貢岷嶓旣藝沱潛旣道漢書注云潛水從漢中沔陽縣南流至梓潼漢壽縣入穴中通峒山下西南潛出今名複水舊說卽禹貢潛水也 曰胤山爲平蜀廢縣卽利州衛治史記胤侯爵胤山出舞衣 曰丙穴地在沔水之南出魚肥美詩疏云沔南丙穴是也其見諸雜記者曰白馬山寰宇記云張平子仕漢爲侍中少時學業于此 曰明月峽晏殊類要云三峽謂巫峽巴峽明月峽也惟明月峽乃在此郡界 曰



滌溪事林廣記云天下十二溪有上真廟爲聖真居  
之滌溪其一也在利州又云漢江水帝廟爲真龍宮  
在漢坪石 其驛路有曰問津志云昔孔明行師于  
此問津故名按卽古嘉陵驛也在治西一里後魏嘉  
川縣設焉唐姚鵠嘉川驛樓晚望詩樓壓寒江上開  
簾對翠微斜陽諸嶺暮古渡一僧歸窗迥雲衝起汀  
遙鳥背飛誰言坐多倦目極自忘機文同嘉川道中  
寄周正孺詩云草木春深處山川雨過時清佳常滿  
目衰倦敢忘詩好尙舊若此飄零今比誰爭如畫堂  
上日日聽新詞又嘉川驛詩云嘉川之西過新棧幾

里朱欄繞青壁我行落月尙在水水影照人襟袖白  
繁英雜綴修蔓上綠錦垂帶纈百尺清香滿馬去未  
休賴爾春風慰行客 鮮于侁爲利州轉運使文與  
可有寄子駿運使詩云西鄉巴嶺下嶮道入孱顏使  
騎到荒驛野禽啼亂山問民青靄裏訪古白雲間幾  
日南城路新詩滿軸還有靈溪寺在嘉川縣中碑目  
黃山谷紀行碑在嘉川縣靈溪寺是 運使子駿題  
以五言曰桐軒竹軒柏軒巽堂山齋燕閒亭會星堂  
寶峰亭凡八景其詩略云金城環雉堞雲屋瞰闐闐  
雙林聳江右九隴覘天外按金城者縣北四里金山

蜀中名勝記 卷二十四  
是也滌溪環其右九隴者去邑西二十里山環九十  
九峰如劔戟之排列昔漢祖駐蹕于此有漢王寨其  
時司馬君實范景仁文與可蘇子由皆和有詩温公  
年譜隨其父利州轉運使遊此有祠在焉 南去有  
望喜樓今廢元稹詩云滿眼文書堆案邊眼昏侵得  
暫時眠子規驚覺燈又滅一道月光橫枕邊李義山  
詩云嘉陵江水此東流望喜樓中憶閬州若到閬州  
還赴海閬州應更有高樓其二云千里嘉陵江水色  
含烟帶月碧于藍今朝相送東流後猶自驅車更向  
南 北爲棧閣道劉禹錫山南西道新修驛路記云

我之提封距右扶風觸劍閣千一百里自散關抵褒  
城次舍十有五自褒而南踰利州至于劍關十有七  
道塗次舍可見于此又云棧閣凌虛下臨含呀層崖  
峭絕柄木絙鐵因而廣之限以鈎闌狹經深陁從而  
拓之方駕從容棧閣之制亦可想也歐陽詹棧道銘  
斜根玉壘旁綴青泥總庸蜀之道塗統岐雍之康莊  
其最險者爲石欄橋方輿云自城北至大安軍界  
管橋欄閣共萬五千三百六十一間惟石欄龍洞二  
閣著名馮鈐幹田云其他閣道雖險然在山腰亦微  
有徑可以增置閣道獨惟此閣石壁斗立虛鑿石竅

而架木其上比他處極險沈佺期過蜀龍門閣詩龍  
門非禹鑿詭怪乃天功西南出巴峽不與眾山同長  
竇亘五里宛轉復嵌空伏湍照潛石瀑水生輪風流  
水無晝夜噴薄龍門中潭河勢不測藻葩垂彩虹我  
行當季月烟景共春融江關勤亦甚巘嶠意難窮誓  
將息機事煉藥此山東岑參赴犍爲經龍閣道詩云  
側逕轉青壁危梁透滄波汗流出鳥道膽碎窺龍窩  
驟雨溪谷歸雲網松蘿屢聞羌兒笛厭聽巴童歌江  
路險復永憂魂愁更多聖王幸典郡不敢嫌岷峩杜  
甫龍門閣詩清江下龍門絕壁無尺土長風駕高浪

浩浩自太古危塗中縈盤仰望垂線縷滑石歆誰鑿  
浮梁裊相拄目眩隕雜花頭風吹過雨百年不敢料  
一墜那復取本志北十里千佛崖卽古龍門閣先是  
縣崖架木作棧而行後鑿石爲千佛像成通衢矣  
唐蘇頲利州題北佛龕記云吾見夫山連岷嶓水合  
江沱山兮水兮路窮險鬱南望兮此情多吾又見像  
法住世于巖之阿百千億萬兮相觀我載琢載追兮  
吾匪他伊古昔兮焦呂不懼必忠信兮艱危若何故  
吾因空而卽有孰不廻向以檀那行矣些陽景頽兮  
翠改色陰風起兮自增波 又蘇頲利州北佛龕前

重于去歲題處作詩云重巖載清美分塔起層標蜀  
守經塗處巴人作禮朝地疑三界出空見六塵銷卧  
石鋪蒼蘚行藤覆綠條歲年書有記非爲學題橋  
按龍門山亦云蔥嶺山梁州記云蔥嶺有石穴高數  
十丈其狀如門號爲龍門又云山東南有玉女山山  
上有一石穴中若房宇有玉女八人不出穴前修竹  
下有石壇風來動竹掃壇如簾又云山北有燕子谷  
中有好磬石卽志所稱石燕山 又北三十里有大  
小漫天嶺極高峻羅隱詩云西去休言蜀道難此中  
危險已多端到頭未會蒼蒼色爭得禁他兩度漫高

駢詩云萬水千山音信稀空勞魂夢到京畿漫天嶺  
上頻回首不見虞封淚滿衣嶺上有寺元稹題漫天  
嶺智藏師蘭若云僧臨大道閱浮生來往憧憧利與  
名二十八年何限客不曾閒見一人行又漫天嶺贈  
僧詩云五上兩漫天因師懺業緣漫天無盡日浮世  
有窮年 又北五十里爲朝天嶺路徑險絕方輿云  
舊路在朝天峽棧閣後開此路人甚便之文與可朝  
天嶺詩嶺若畫屏隨峽勢水如衣帶轉巖陰按今設  
有沙河驛亦沿江行其曰朝天者水驛也 四十里  
爲潭毒關志云潭下淵底有一鐵索見則兵動向有

御前軍屯此以捍蜀口 又二十里爲神宣驛卽古  
籌筆驛也相傳武侯出師駐此唐杜牧詩永安宮受  
詔籌筆驛沉思李義山詩魚鳥猶疑畏簡書風雲長  
爲護儲胥是也神宣驛者世傳二郎神持劍逐蹇龍  
過此因名 又八十里爲九井驛志云琳瑯九井以  
琳瑯山出泉九處濺石若琳瑯也碑目云九井灘舊  
時有蝦蟆青牛青埕三巨石伏水爲舟楫害淳熙間  
利路提刑張曩容募降人再得者治械如桔槔狀治  
鐵爲杵重千五百斤拋擲半空而下三石俱碎化險  
爲夷有碑刻剝落其上爲七盤關乃秦蜀分界處唐

沈佺期詩獨遊千里外高卧七盤西山月臨窗近天  
河入戶低後人因立爲天河閣顧非熊天河閣卽事  
云萬壑褒中路何層不架虛徑雲和棧起樵徑帶畚  
餘巖狖牽垂果湍禽接躍魚相逢維艇處塢裏有人  
居

昭化縣

葭萌地入廣元而其縣理在漢爲漢壽晉爲晉壽者  
則屬昭化本志云縣北百八十里施店驛卽古葭萌  
驛驛卽故縣址也未通保甯路時自秦入蜀罔有不  
由昭化者唐張說再使蜀道詩云耿耿葭萌道蒼蒼

褒斜谷烟霞爭海深雲山共重複古來風塵子同眩  
望鄉目芸閣有儒生輶車倦馳逐青春客岷嶺白露  
搖江服歲月鎮羈孤山川俄反覆魚遊戀深水鳥遷  
戀喬木如何別親愛坐去文章國蟋蟀鳴戶庭蠨蛸  
網琴筑 北接廣元則龍門石櫃白水景谷之地彼  
此參錯海內東經云白水出蜀而東南注江郭景純  
註水微白濁今在梓潼白水縣源從臨洮之西傾來  
經沓中東流通陰平至漢壽縣入潛梁州記云城西  
南百八十里白水關卽李固解印綬處也蜀志先王  
斬楊懷高沛于此 元和郡國志云景谷縣西南二

十五里有白馬山孔明造木牛流馬處 南接劍門  
則有大劍城元和志云卽秦張儀司馬錯伐蜀所由  
路又謂之石牛道有小劍城注水經云小劍城去大  
劍城三十里連山絕險飛閣逼衢故謂之劍閣也是  
唐益昌縣地 又有小劍故城在益昌縣西南五十  
里其山截野橫天犇峽倒地挾楚包漢呀秦擁蜀  
先王以閣道至險又置閣尉焉岑參和杜相公發益  
昌詩云相國臨戎別帝京擁麾持節遠橫行朝登劍  
閣雲隨馬夜渡巴江雨洗兵山花萬朶迎征蓋川柳  
千條拂去旌暫到蜀城應計日須知明主待持衡

利州淳化帖跋云慶元中四川總領權安節以淳化  
戲魚帖并釋文重刻石劍門寺內石今已不存權總  
江州德安人其家猶有當時墨本甚多釋文字畫較  
臨江帖爲稍大云 劍嶺中有馬鳴閣志云先王使  
陳戒絕馬鳴閣魏武聞之喜曰此閣通漢中之陰平  
乃咽喉之要路 又有白衛嶺唐明皇幸蜀過此見  
玄元皇帝騎白衛而下示取祿山之兆遂封嶺神白  
衛公唐詩紀事載明皇幸蜀登白衛嶺眺覽良久歌  
李嶠山川滿目淚沾衣富貴榮華能幾時不見只今  
汾水上惟有年年秋鴈飛詩曰李嶠真才子也 有

桔柏潭今柏林驛是驛有古柏土人呼爲桔柏故以  
名潭志云桔柏渡舊傳其津有二魚負舟往往沉溺  
一道士求渡操舟者難之道人云吾乃葛仙翁命取  
石書符令舟人佩之至中流二魚果出擲符水中少  
頃浪息次日二魚死于龍爪灘下按唐書玄宗幸蜀  
次益昌縣渡吉柏江雙魚夾舟而迎從臣以爲龍也  
杜甫桔柏渡詩云青冥寒江渡架竹爲長橋竿濕烟  
漠漠江水風蕭蕭連竿動嫋娜征衣颯颯急流鴉  
鷁散絕岼鼉鼉驕西轅自茲異東逝不可要高通荆  
門路闊會滄海潮孤光隱顧吟遊子悵寂寥無以洗

心曾前登但山椒

蜀中名勝記卷之二十四

蜀中名勝記卷之二十五

閩中曾學佺能始著

保甯府二

巴州

山曰大巴小巴世所稱九十巴山也志云大巴之險  
過于棧道下逼漢中又云小巴之南即古巴國繫年  
錄云巴之北境即米倉山下視興元出兵之孔道即  
今關堡相望 輿地廣記云巴江源出大巴山至  
當州東南分爲三流而中央橫貫勢若巴字通志云  
清江源出廣元縣前通平鎮歷舊恩陽縣至州與巴



江合寰宇記云清水一名白石水卽向白石縣之所  
理也李白巴水歌云巴水急如箭巴船去若飛十日  
三十里卽行幾歲歸嚴武巴江喜雨詩云連夕霧霏  
類建旆送將涼意滿郊垞江邊萬木大半綠天外一  
峰無限青却信神龍元解事豈容旱魃更爭靈從今  
懷抱如水釋閉閣燒香伴六經鄭谷巴江避亂詩云  
亂來奔走巴江濱愁客多於江徼人朝醉暮醉雪開  
霽一枝兩枝梅探春詔書罪已方哀痛鄉縣徵兵尙  
苦辛鬢禿又驚逢獻歲眼前渾不見交親 華陽國  
志漢末劉璋以墊江以上爲巴郡江州至臨江爲永

甯郡胸臆至固陵爲巴東郡而巴遂分矣志云此居  
其中爲中巴宋洪邁丹梯書院記云今之巴非昔之  
巴也本志忠義廟祀漢嚴顏張飛名宦載王濬恐但  
沿巴之名然按碑目嚴將軍廟記在巴州城西門內  
唐貞元元年韋曾撰則祀之亦非一日矣惟嚴武薛  
逢爲巴州守則今之巴也 杜甫寄馬巴州詩云勳  
業終歸馬伏波功曹非復漢蕭何扁舟繫纜沙邊久  
南國浮雲水上多獨把魚竿終遠去難隨鳥翼一相  
過知君未愛春湖色興在驪駒白玉珂嚴武巴嶺答  
杜二見憶云臥向巴山落日時兩鄉千里夢相思可

但步兵偏愛酒也知光祿最能詩江頭赤葉楓愁客  
籬外黃花菊對誰跋馬望君非一度冷猿秋鴈不勝  
悲鄭谷巴賓旅寓寄朝中從叔云驚秋思浩然信美  
向巴天獨倚臨江樹初聞落日蟬衰榮悲往事漂泊  
念多年未便甘休去吾宗盡見憐王周和杜運使巴  
峽地暖節物與中土異黯然有感詩云垂柳參差破  
綠芽此中依約欲飛花春光是處傷離思何況歸期  
未有涯其二云始看菊蕊開籬下又見梅花寄隴頭  
攬轡巴西官局冷幾憑春酒沃鄉愁張禕巴州寒食  
晚眺云東望青天周與秦杏花榆葉故園春野寺一

傾寒食酒晚來風景重愁人任約和巴州牟刺史韻  
云鄉關目斷隔咸秦又向巴江度一春可惜清明好  
時節看花空憶洛陽人 治內有春風樓秦坦記云  
奇峰森列躍入清漢高下眩轉隔閣風雨又有擊甌  
樓唐張禕詩駐旌元帥遣風在擊缶高人逸興酣水  
轉巴文清溜急山連蒙岫翠光涵宋馮介詩坐上擊  
甌清似玉者此也碑目云擊甌樓唐中和四年尙書  
右丞相戶部張禕記賦在樓下按擊甌樓賦寔張曙  
作也序略云宋玉九辨悼余生之不時也甲辰竄身  
巴南避許潰師郡刺史甚權接眷一日登郡東樓下

蜀中雜記 卷二十一  
臨巴江饌酒簇樂以相爲娛言間有馬處士携善擊  
甌者至請卽清謙爰騁妙絕處士審音以知聲余審  
樂以知化斯可以抑揚滯放頓挫匏竹運動節奏出  
鬼入神太守請余賦之余曰不圖爲樂之至於斯酒  
酣舐筆乃爲賦云爾宋皇祐初知軍事馬預作記曰  
爲廳壁有唐御史裴禕會昌四年記宋庶子創建東  
樓此其事也 碑目云州內有紫極宮天王堂俱唐  
大中元年軍事判官進士蕭珣記有折柳亭宋嘉祐  
五年太守鄭淵賦折柳詩十絕句刻石有巴南十七  
景詩宋知閬州軍蘇欽以閬中望江南十首記郡景

別駕彭永仍賦巴南十七景答之 碑目又云唐會  
昌四年巴州刺史裴禕修廨宇記巴南新置屋宇什  
物石記俱在郡廳 城外東龕在巴江東岨巾子山  
下卽唐兜率寺寺廢碑存 西龕有古墨岩在懸岷  
上有壯觀二大字云是李太白筆有流觴亭在西龕  
寺碑目云唐乾元戊戌嚴鄭公武所創大厯間盜起  
地遂廢開成丙辰刺史唐元封復修葺取牟士諤流  
盃十四詠以自序爲證又云有嚴侍御暮春五言刻  
亦在寺內有唐人題西龕櫻桃其名磨滅按州志城  
北三十里鼓樓山之旁有玲瓏山山頂有泉出小石

如櫻桃自然有竅可以穿縷村兒女以爲瓔珞名曰櫻桃珠如此則西龕所詠爲石爲果未可知也 嚴武題龍日寺西龕石壁詩云聖澤久潤物皇明常燭幽恩從祥風朝德與和氣遊報國建香刹開蠻臨僻州天長面綠水地迥起朱樓尋異遍眾壑坐禪逢一丘永懷根本妙誓以身心修竒色豔草滿珍名嘉樹稠遠江崩濤喧複澗微雨休嘹唳猿響谷參差峰入流碧烟曳篁徑白日懸沙洲泛海謝安石吟詩王子猷揚雄愛清靜山簡多優游性分固有適著龜何足求神閒孤臺月日送千里舟攜手逸羣品浩歌邈悠悠

悠山情慕禽尙詩格警曹劉旌能舉滯時選異拔竒儔鼎食當自致巖棲難久留嗟余參符守漢王遠分憂徃徃行春到聞鐘散客愁 朱尹游西龕詩朝出城南門循溪陟西嶺西嶺鬱岩堯切隱金僊境懸崖古墨存白日蛇龍呷嵐霏濕空濛泉澗咽清泠汲之淪山茗數啜心魂醒城郭轍在襟三墩聯九井四野各嬉照犬鼠亦無警豈曰予所能帝德實綱領獲茲簿書餘怡情對斯景 任約題西龕詩門徑森寒柏小橋穿竹溪澄江朱檻北晚照碧巖西修竹清泉逗高楠邃閣齊虛廊面青壁危棧跨丹梯絕頂舒平席

遙峰出半圭軒窗俯星斗襟袖拂雲霓甘露春膏淡  
濃嵐晝靄迷嶺猿悲夜嘯谷鳥響晴啼唐寺南龕近  
巴城東郭低杯流故池水崖刻古人題酷暑不能到  
清風如鎮携何年脫韉鎖來此養真棲自註今歲甘  
露降于龕前松柏也 南龕有廣福寺志云唐時建  
有乾元年間契書碑目云唐古佛龕石刻在城南二  
里大書乾元三年山南西道嚴武奏臣領牧巴州其  
州南二里有古佛龕舊有鐫佛五百餘伏望特賜洪  
名勅以光福爲額唐詩紀事載嚴武史俊楠木唱和  
詩碑目云刻在南龕又云郊昂陪嚴使君暮春五言

二首在龕詩甚典麗又云南龕題詩石刻多在州南  
二里之廣福寺自唐迄今名公題詠皆存又云南山  
記唐中和四年尙書右丞相戶部張禕題圖經云定  
僧在南龕上以漆漆其真身龕置石壁不知何時人  
惟嚴武奏乞山南寺額表云願度有道行僧永以住  
持俾其修習意亦唐以前人也本州志云丹梯書院  
在南龕山因其山重疊聳秀有若丹梯而名舊志載  
杜甫曾讀書於此而建後經兵燹宋紹興二年知州  
趙彥戒重建元季復燬惟古碑尙存唐進士楊興義  
有和杜甫詩云莫嫌袍紫歸家阻且慶豐年雅俗安

又題秋風詩云霜風一夜將紅葉換盡江頭萬木青  
通志云南龕有雲間閣杜甫寄嚴侍御詩遙知簇鞍  
馬回首雲間閣者此也 宋權維重修雲間閣記云  
閣在南龕絕頂窺自李唐歲久敝壞寺僧請易而新  
之不閱月碧瓦朱甍雕梁畫楯突然聳出于一羣山  
之表暇日置觴倚檻周覽巖壑萬狀雲烟出沒朝暮  
變態曾無窮已則昔之隱狀晦藏而不見者今若神  
驅而出之皆離前出幽吐奇露彩章章于目前也  
羊士諤遊南龕詩云物外真何事幽廊步不窮一燈  
心法在三世影堂空山果青苔上寒蟬落影中歸來

還閉閣棠樹幾春風趙公碩和郭使君題南龕韻云  
南龕幾百年古木闕雲崦崖傾千仞垂路懸一線險  
飛狖喜層巔羸驂怯虛塹楓葉紅爛斑松蓋翠搖颭  
石皴風雨剝殿古丹青儼拂拭坐空巖摩挲觀翠琰  
江勢從何來斗起不以漸憑危意欲飛眺遠目驚覩  
鳥鳴山更幽綠淨衣好染烟際漾漁舸風前亂霜壓  
縱賞有餘歡高懷無一慊尺璧非所寶白圭焉受玷  
入蜀真可念得郡亦云忝雖遠長安日猶勝陽山貶  
平生足疎曠甯復事拘檢佳時方一來薄日已半晡  
雨餘烟草深月墮山樓蠶珍重詩律高詞獲神光閃

民樂樂時康無憂憂歲歉殷勤謝吳霜歸鬢不堪點  
相連有美農臺志云在治南二里相傳昔梁太守  
桓宣于此勸農而築今廢址不存 有唐太子賢墓  
志云在治南二里高如一小阜唐史高宗上元二年  
夏四月立雅王賢爲太子永隆元年八月廢爲庶人  
開耀元年冬十一月徙於巴州中宗嗣聖元年太后  
殺故太子賢太子嘗作黃臺瓜辭云種瓜黃臺下瓜  
熟子離離一摘使瓜好再摘令瓜稀三摘尙云可四  
摘抱蔓歸當時有銘其墓者云斷一指得天下凡人  
不爲殺愛子竊帝位武后行之噫嘻賢之遺隧萬世

之元龜 北龕志云在北山一里有白馬泉九州要  
記云卽黃牛山有穴白馬奔出故名碑目云王望山  
舊名北山山半石壁隱出老君像唐人爲賦北山老  
君影迹詩圖經云王望字子濛開元初嘗與元宗遇  
俗傳爲晉時人旦跨白驢入長安市暮復回勝覽云  
王望山在江之北岍自郡城絕江而登山高二里許  
岩徑極險占一郡之勝相傳王真人得道此山真人  
名蒙故名王蒙山舊志云唐元宗控白驪至此山望  
見京闕曰此去京師不遠故名王望志云龍洞在王  
濛山岩腹間楊羲仲記云左曰東洞門如鏡鑿高幾

蜀中名勝記 卷二十一  
三百尺耀若太儀之庭堯率之宮又百餘步則空穴  
開明有琉璃洞及釋迦像石犬石鳥凡石之詭形怪  
狀莫不畢獻又六七里適後山之根右曰西洞其奇  
怪亦亞于東洞楊虞仲遊王望山詩云白雲環其巔  
流水遶其趾古木與雲齊偃蹇龍蛇似飛仙渺何許  
風馭難慕企手種空流傳歲月尙誰記化鶴空歸來  
其樹還可指僊凡隔咫尺世人謬千里丹竈空伏火  
河車爭挽水學僊僊益遠槁死空山裏我欲問真訣  
豈憚航一葦便當捐冠簪超然謝塵滓僊人拍手笑  
外物儻來耳 有君子泉宋黃燠則銘云有冽者泉

達于東南浩然天中其流無窮于暑而涼于冬而溫  
豈其矯耶有變者存州志云未詳所在惟志東四十  
里廢曾口縣西朝陽巖有之其泉自巖石流出清冽  
無比上鐫有君子泉三字宋人來官多遊于此石刻  
具存今附錄于後 嘉定壬申夏五月朔邑令會稽  
宋拱闕尉錦屏鮮于永清避暑來集拂巖雲弄泉玉  
倍有山水之樂所謂意不在酒也 銅梁曹闕龍馮  
伯規何孚望古郫李忠父同遊此汎舟酌巖下日西  
乃歸淳熙己酉閏月十有二日 巴州都監權縣尉  
義渠毛仲子中通江曾口縣巡檢崆峒王願天啟通



江縣尉長安永延年仁叔淳熙八年十月二十一日  
同遊朝陽岩 邑宰蓬池何渙之享通邑尉漢中李  
元竦子莊以閏正月下澣日遊曾口故縣基野飲于  
修篁古木之下絕江少西息朝陽巖酌君子泉流連  
至暝而歸皆乾道九年也 有几水方輿云水形如  
几竒章縣臨之志云舊竒章縣在州東八十里陸游  
過竒章僧剎詩轉盡窮山入翠微松陰拂拂冷侵衣  
長天秋水自一色斷岫孤雲空四飛客路何年閒馬  
足蟠溪平昔負漁磯僧牕不得吟清晝又擁籃輿到  
夕暉 有平梁城宋淳祐都統張實創築取掃平梁

州之義也下有平梁洞妙通居士羅南仲所居有石  
床石竈按舊成記云平梁山頂有地數十畝居民數  
戶在上住種納稅矣志云在川西二十里 有化成  
縣輿地紀勝化成縣鳳谷山之上 有要羊觀熙甯中  
通守楊黃中記云唐明皇與葉法靜神遊於羊蒙山  
忽思豢羊山靈遽以羊進詔于其地立觀今名廣福  
志云在州西四里唐喬琳巴州化成縣新移文宣王  
廟頌云殷之系周聖之斯文生我夫子世教之君周  
微唐興于祀于茲春秋祭菜俎豆其時維巴之南亦  
揭其宇盧公宰邑人之父母假我升堂陋彼環堵爰

就爽塏長松之下公之志思人亦勤止變此夷俗參  
乎孔里學者行之造次于是 有恩陽縣碑目云  
唐貞元石刻在恩陽縣南渡江登石梯數百級上義  
陽舊縣治石梯之側懸崖上有刻字云唐貞元四年  
十月二十日再修此路餘皆磨滅不可辨又云大厯  
初韋應物送令狐岫宰恩陽詩亦刻石于縣之驛亭  
小說撫遺云古靜州知州王鶚子讀書于義陽山  
忽一女子前自稱爲張笑桃題紅梅詩于壁墨跡未  
乾遂不見人疑爲梅仙以山屬平梁故志于此詩云  
南枝向暖北枝寒一種春風有兩般頻上高樓莫吹

笛大家留取倚欄杆按恩陽卽義陽也詳見通釋  
又西北百里有大牟縣碑目云在恩陽縣西北百里  
有斷碑刻云南隆州大牟縣界十里北集州難江縣  
界五里縣令李昱立 按曾口奇章化成恩陽俱梁  
曾通年置大牟唐武德置屬集州

通江縣

治在古壁州壁州者以城西南壁山爲名志云壁山  
在縣南一里有嘉祐寺唐節度使鄭畋建至今人呼  
爲鄭公山寺碑目云通江縣一里龍興寺碑唐壁州  
刺史鄭凝績之父鄭畋作乾符中凝績侍養其父畋

于壁也又云壁州山寺記大唐中和歲次癸卯丞相  
鄭畋撰略云壁山境勝之所鬱密喬樹蔥蒨景態立  
月澄日搜索竒祕得泉洞于西南維鑿石架篁繚繞  
登降高懸旗旛疏爲泓沼峭壁危棧遂來商旅乃于  
舊亭東隅建構佛宇召僧匡信主其事多出私財以  
益之爲堂三間周迴爲門爲廊二十六間高下環合  
翬飛鱗次廊外爲僧房庖厨數十間又立眞室方丈  
高界爲左右翼愚與凝績泊猶子昭胤俱寫形于方  
丈中負山面江雄壓勝地日月先照風雨所交鐘梵  
松篁鏗鏘滿聽千家薨棟歷歷在眼晨烟夕艷輝燦

戶庭鷗鷺篙榜以資景物于時行朝卿士或寄寓于  
諸州給事中孫君備秋曹正郎鄭君損皆柅車此地  
邀以同筵書琴棋畫隨後間作自仲春至于維夏也  
本志又載其碑陰云僕至郡觀舊碑三埋于戟扉前  
之泥中遂飭役兵出而滌之其一斷而磨滅者乃唐  
鄭公臺文修山寺記也始讀之文多訛缺及其完處  
令人愛歎之不已而又得公進退之詳按僖宗紀并  
公傳各有舛略此公文是可信者矣惜其湮沒遂命  
筆正訛補缺離句綴意解凡六十七字斬石命僧守  
丕書之刻而立于州學庶幾永永記成于唐中和甲

辰孟秋二十有三日重刻于大宋之嘉祐癸卯孟秋  
中澣九三甲子云太常博士俞斌君玉序按此則嘉  
祐寺以重修得名者原名爲龍興也 本志又載鄭  
相遺踪在壁山下石澗中梯石齒披烟蘿入幽巖苔  
蘚間有字云檢校司徒守太子太保鄭畋門吏給事  
中賜紫金飛魚袋孫儲尙書刑部郎中賜紫金緋魚  
袋鄭損中和三年十二月八日收訪泉石偶題于此  
僧匡信看題傍又刻有畋明年孟秋念七日與姪昭  
胤至此訪別一段是其碎金斷碑尙有可尋者 碑  
目云薛使君布政碑唐乾符年間壁州刺史裴真辭

作乾符間立又云壁州神廟石刻在今通江縣北四  
十步有元光三年制書本志云元妙觀右星精石唐  
人刻篆甚多民間琢毀其半俱在治內唐推官鄭損  
星精亭詩云星沉萬古痕孤絕勢無隣地窄少留竹  
空多剩占雲釣篷和雨看樵斧帶霜聞莫惜尋常到  
清風不負人 方輿云歌籟山與壁山相對上有石  
鼓聲聞數里連擊卽雨通志云通江縣南有秋錦山  
隔江望之如錦與壁山相連也 壁山之上玉鞭  
池志云昔有人拾玉鞭于此池內因名按朱慶餘送  
壁州劉使君詩江分入峽路山見拾鞭人卽詠此事

有鳴鹿祠五代史王建爲壁州刺史後僭位永平三年麟見于壁山二鹿隨之此立祠之始也宋皇祐初太守胡俛記其事云朝廷有大詔令官屬有遷罷鹿必鳴鳴于山陽爲福鳴于山陰爲禍靈驗如符山下枕諾水諾水卽宕水所激聲若呼諾後魏諾水縣以此得名也 志云縣東南隅有公山隔江形如公字舊傳張道陵七世孫刺集州于此上昇絕頂有張康侯廟 舊志載孫思邈洗藥于縣東十里石澗之畔名爲孫氏池亭石灶丹臼尙存按碑目云孫氏園在通江縣二十里龍灘之側唐末監察御史盧重阜與

壁州刺史辛巢父等六人分詠賦詩有石刻存宋朱仲賢孫氏池亭詩云密林抱清溪微徑入烟靄亂流縈石轉浩浩兼萬派披蘿出潭上結宇在竹外坐嘯孤雲還開軒遙相待崩崖臨絕壑幽趣驚盼睐渟滿泄其餘下注陰壑瀨道情留霜簡詩興延臯蓋賞逐景物偏心期臨仙槩日低廻岡後鳥入寒林內暝色交殘光明滅羣木態後之視今日猶今視千載永懷滄洲人功成身將退符陽縣令陸干城和云斷崖青松林林下覆烟草一徑捫綠蘿數里尋芳藻巖開野人屋結構憑孤島石斷寒泉流亭幽翠巘繞攫挈龍

虎狀宛若鬼神造隔崖間湍聲當聽見夕照巴南絕  
境處勝似東溪好萬籟清心胸孤雲豁煩惱鑄邀驄  
馬客寫物窮探討琴匣閒時開柴門不須鑰孰云造  
化工永與天地保長揖謝王侯塵紛徒浩渺 本志  
又云西十里有古佛龕唐人題詠風雨剝蝕惟一碑  
粗可識乃龍朔中壁州叅軍蔡洪劄又一碑乃阿彌  
陀佛龕也 縣之洞有二一曰龍洞志云在西二百  
里吳垵鄉洞周圍二十餘丈高三丈深七尺內有池  
殿清瑩湛然一曰蛇洞志云在北四百里南壩寺唐  
建也每歲端陽前後有蛇自柱礎間出沿階滿室大

小顏色非一種然不爲害昔人傳三萬四千尾不可  
數也按此卽巴蛇洞云 礮有二一曰仙人礮志云  
在東三百里有石竇可容百人崖上刻公孫秀才讀  
書處年代不可攷有山茶高數丈相傳是唐時樹一  
曰牛角礮志云在縣西二百里金溪有石室可容千  
人石笋數十自崖頂下綴望之稜稜如牛角俗呼爲  
牛角礮按說文礮礮石也此以形似得名 古墓有  
二一曰吳將軍甘甯墓志云在縣西百里通志云在  
通江縣西露浴溪上謂之甘谷一曰向佺墓志云東  
六十里大鐘山獨起萬山中如覆鐘其下卽向佺墓

左龍池山峭立挿漢蒼松偃蹇有石池龍湫注之  
古城關二一曰得漢城縣志云東北百里萬山中崛  
起塹巖四面峭絕獨西南二徑凌險轉折而上誠一  
夫當關之勢斷崖多前代遺踪可識舊志載漢高帝  
據此以通餉道石壁刻云宋淳祐己酉季冬大使余  
學士親臨得漢城山視其形勢而授都統制張實躬  
率將士因險塹壘儲糧建邑爲恢復舊疆之規分任  
責者總管王昌金之福鈐路張虎臣司整杜淮王安  
杜時順徐斯李成劉文德劉清梁福陳寶賀山進李  
崇制領郭俊杜成周仙周 一曰桐栢關志云在東

北八十里與樗林關相對有關羽廟相傳神曾守此  
畊者往往得箭鏃

### 南江縣

寰宇記云南江縣後周天和五年置以江水難涉爲  
名通志云國初始易爲南江也南江出米倉山流經  
縣前下與巴江合 碑目云唐韋江公山威惠廟記  
天寶改元田彥識撰神乃漢張魯後又云唐李繼顏  
誥詞刻于郡廳光化三年中書舍人錢珣行撰有城  
牙樓記圖經以爲李楫文有舊碑二其一僞蜀廣政  
己未之記其一 天聖乙丑之記 碑目又云集州兩

角山記唐集州刺史楊師謀書今在難江縣志云南  
三里孤雲兩角二山王子韶詩孤雲兩角去天一握  
有石刻蕭何追韓信處下有溪是名韓溪按孤雲兩  
角山及截賢嶺俱在棧道去縣二百餘里其碑刻則  
移近縣耳又有宋集州刺史張龜年回車院記道士  
蒲善從勒石 縣之勝者有潭曰放生石刻放生潭  
三字水落方見意亦唐刻也其上鐫七佛龕圖經云  
乃唐張禪扈從僖宗入蜀時經此所鐫 有峽曰石  
鼓碑目云趙寅爲集州刺史有石鼓峽記在難江縣  
有石曰探梅志云縣東北五里探梅石亂石中有

刻云宋人少華陳祉介鄉浚儀潘士政執禮厭次來  
高元敷携樽探梅靖康丙午閏四月幾望 有渡曰  
莎鼻碑目云在難江縣有唐集州刺史蘇味道題字  
有灘曰洋灘志云縣北洋灘楊侍郎墓碑字多蝕  
碑座是菜玉見存但不知何代人 有澗曰菖蒲碑  
目云菖蒲澗記唐開成四年集州刺史蘇味道題跡  
志云蒲菖澗在縣北一里懸崖峻壁石室空曠有唐  
宋諸賢石刻云自潭北入澗行經此新開路東不啻  
三百步其間巨石巒倚嘉木交映空森復聳奇勢異  
狀綠苔青蒲印模履跡捫手探足無非蒼翠幽禽皓



蜀中名勝記 卷二十一  
皓飛泉渥渥若有異人仙客鼓瑟吹簫于洞穴之中  
使人心逸神暢悅然忘歸斯實方外之佳賞也噫自  
有此澗杳無人蹤豈異夫浮世之事逼塞有時耶今  
鑿畦爲路梯石爲徑連延抵于碧崖盤石之東究其  
澗分之所開成四年十月二十三日武功男子記僧  
宏真尋澗之迹藏諸山房 古碑刻云有宋改元政  
和清明後一日權縣事長安杜德機元發訪菖蒲之  
溪薄尋其源言採其藥轉步而返則摳衣碧巖屏石  
而坐解帶古床幄雲而息然後歸頗恨得此之晚  
大宋改元政和辛卯歲仲春月清明日縣吏馮子茂

典職長楊子山邀同局中李二都王四都楊工四沿  
澗究菖蒲碑文兩日方返故題于碧巖三月十四日  
楊嵩岳山書記 廣都蔣城吳大年古邨李椿秦亭  
權師雄大梁趙恂聞中馮時周谷米居約以紹興十  
八年九月十有四日訪古菖蒲澗觀唐人武功子石  
刻置酒碧巖溪效柳子序飲損其籌爲一題名投之  
澗或涸或止或沉皆賞惟直前無沍滯則免坐客率  
三四十飲笑歌諧嬉日晡乃罷畢成記 紹興庚辰  
上巳游菖蒲澗飲于碧巖效晉人褱褱故事穎昌王  
芹岩渠韓慶孫開封喬嘉成都周瑞行男夏卿凡五

蜀中名勝記 卷二十一  
人 李異李國用楊義仲勾成允唐棟淳熙甲辰正月晦來遊時春日融明熏風和暢爲蘭亭之飲以歸嘉定壬申仲春三城郭仲深攝事集山清明後一日遊菖蒲澗披尋古巖眉山扈才叔小益劉溫叔潼上楊珍父同來 有山曰十二峰方輿勝覽云十二峰在難江縣四十里馬盤灣巉巖聳秀最爲奇觀有客題詩曰挿立翠屏峰十二爲君喚作小巫山 有水曰明水寰宇記云明水在難江縣北五十餘里水出硯屏林木山川之形隱于石間 有古城曰平梁志云平梁城遺址在縣西三百里上有古寺龍池淳

祐間都統制張寶遵大使余龍學指授規畫率諸軍剽平梁山城云取掃平梁州之義坐據要地壁立萬仞天人助順漢中在掌握矣刻于石 有橋曰五馬志云李虎仙者往來難江通江二縣縣人修五馬橋工匠數十虎仙于皮袋中出小釜可容三升以米麪食物納其中炊之以飼人人皆飽 有寺曰柏院志云縣南六十里柏院寺唐高宗末年建相傳爲章懷太子修行之所有碑文剝蝕 有宮曰紫微志云唐賈真人居難江縣之紫微宮白晝登仙留詩壁間云此後不知誰有分壁間留得上天梯 有觀曰銅人

志云縣南隔江銅人觀唐開元集州刺史李成裕奏  
設肖像皆銅初名紫極宮有殘碑數行開元二年兵  
部尙書牛仙客文宋集州守楊方平重立石又有碑  
刻載黃蓬石事畧云黃蓬石乃大蓬之仙者性顛蒙  
唯充薪水偶汲于寺見金甌貯水乃飲水而甌是  
夕勞困卧藩籬間醒忽穎悟能詩蓬之名士無能出  
其右者頃乃隱于大蓬人不之見 按玉堂閒話云  
興元之南有大竹路通于巴州其路則深谿峭巖捫  
蘿摸石一上三日而達于山頂行人止宿則以絙蔓  
繫腰縈樹而寢不然則墮于深澗若沈黃泉也復登

措大嶺蓋有稍平處徐步而進若儒之布武也其絕  
頂謂之孤雲兩角彼中諺云孤雲兩角去天一握淮  
陰侯廟在焉昔漢祖不用韓信信遁歸西楚蕭相國  
追之及于茲山故立廟貌王仁裕嘗佐褒梁帥王思  
同南伐巴人往返登陟留題于淮陰祠曰一握寒天  
古木深路人猶說漢淮陰孤雲不掩興亡策兩角曾  
懸去住心不是冕旒輕布素豈勞丞相遠追尋當時  
若放還西楚尺寸中華未可侵若其崎嶇險峻之狀  
未可殫言也

蜀中名勝卷二十五終

三十一

蜀中曹學佺能始著

漢陽山州之主山也武功康海德瀕劍州重陽亭記  
對漢陽是矣 碑目云劍州石柱  
刻東園質泉賦唐貞元中蘇洪之  
和極樂院銘大順三年劉崇望記

四年四月一日記宋高宗籍田手  
環也 碑目重陽亭大中八年太  
卷二十六

蜀中名勝記卷之二十六

保寧府三

劍州

漢陽山州之主山也武功康海德瀕劍州重陽亭記  
所云瀕枕聞溪前對漢陽是矣 碑目云劍州石柱  
文晉太元十八年刻東園質泉賦唐貞元中蘇洪之  
刻開元寺重修中和極樂院銘大順三年劉崇望記  
宣詔亭碑蜀天成四年四月一日記宋高宗籍田手  
詔碑皆治內之琳琅也 碑目重陽亭大中八年太

蜀中曹學佺能始著

五終

守蔣公侑始建李商隱序而銘之石刻在郡東山之陽志云東南一里東山又名鶴鳴山上有磨崖顏書元結中興頌蔣侑重陽亭在焉李義山記略侯講天子意三年大理乃大鑿險道緹石見土其平可容考工車四軌建為南北亭以便勞餞又亭東山號曰重陽以醉風日南北經貫若出平地無有噫嘻侯姓蔣氏名侑銘曰仁之為道隆磊英傑天簡其勞羨以事物惟君之缺撮取不窮有如武庫蔣之有世以仁為歸伯氏之宜仲氏之思厥弟承之純而不紕以令為侯天子之德汝侯為理劍有盈昃君南臣北父坐子

伏飲牛漚菅田訟以直市正獄清謁歸告休朝雨滂沱濕其峭頭民樂以康願有顯庸侯作南亭北亭是雙至于東山乃三其功摧險為夷大石是扛亦既三年民走乞留伯氏南梁重弓二矛古有魯衛惟我之曹惟仁之歸有世在下其攄其超尾鬣缺馬惟蔣之融由唐龐叡惟是亭銘得其麤且大中八年九月一日太學博士河內李商隱撰 宋閬州通判吳師孟記略東山一峰特竦千仞眾小山迤邐卑附如奔走如侍從茂林蒼崖烟靄蒙密有一亭焉冠於山椒碧瓦鱗差朱欄霞明長溪清潄流影不去乃唐刺史蔣

侑所建重陽亭李商隱序而銘之者也權知州軍郭子皋題其碑後曰李義山記重陽亭曰作亭東山以醉風日而不記名亭之因子讀張平子西京賦有云集重陽之清澄釋云上爲陽下爲陰清澄亦爲陰則斯亭也上據高巘下瞰澄溪蔣公名亭之意其得之於此耶釋碑以告來者元豐六年題又康德涵記以爲亭畔有石刻古重陽亭四字宋張琬筆按東山卽卧龍山寰宇記卧龍山在縣東二里盤圍州市高百丈其上爲九龍山高三百丈唐天寶六年敕改龍祠山山上曾置九龍祠也州北爲故壘山益州記

云山有姜維拒鍾會故壘其山峭壁俯臨絕澗又二十里卽劔門關棧閣相望顏師古曰棧卽閣也按史記蔡澤謂范雎曰今君相秦計不下席坐制諸侯棧道千里通于蜀漢華陽國志云諸葛亮相蜀鑿石架空始爲飛閣以通行道如此則棧閣爲二矣蜀漢以前曰石牛道史記秦欲伐蜀而不知道乃作五石牛以金置尾下言能糞金以遺蜀蜀王負力而貪使五丁開道引之秦因使張儀司馬錯尋路滅蜀唐李遠五丁力士開蜀門賦云在昔褒斜未通荒焚異域物產難究封疆罕測秦王將欲廣其南徂其北張

儀于是度其勢量其力假牛之計斯設饋女之功是克蜀王乃命力士闢高山貪功饕餮忘情險難捫峰巒於日側扶虺蜮於雲間將以砥嶄崿等躋攀俄而白日蕩搖玄天忽霍鬼哭神怨風號霧廓怒髮森植雄心震躍灑珠汗以電散瞪星眸而電落將欲斷煙靄排巖崿謂巨靈之所拓蹂重林迴絕壑疑夏后之所鑿吁可畏哉江標峻棧之形呀然地裂闕闢高峰之色騖若天開已而後患方啓前心莫遂道路無阻關梁鮮備五丁死而蠻黨移一逕通而秦人至也輿地廣記曰石牛道者山有小石門穿山通道六丈

餘漢永平中司隸楊厥又鑿而廣之諸葛孔明以大劔至此有隘束之稱乃立劔門縣復于閣道置尉以守之常璩云閣道三十里至險有閣尉桑下兵民也晉書李特入蜀至劔閣顧盼險阻曰劉禪有此地而面縛于人豈非庸才耶隋置閣之地皆有關官而于劔閣獨未置關至唐始置劔門關後又置大劔戍小劔戍五代董璋遣兵扼劔門關又爲七砦按圖經云關官許令直受頒降詔赦亦許直行申發文字聖節月旦亦有表疏異時訓飭關吏至親洒宸翰所以重設險也周地圖云大劔山亦曰梁山山海經高

梁之山其上多堊其下多砥礪其木多桃枝鉤端有  
草焉狀如葵而赤華實白跗可以走馬王隱晉書張  
載隨父收入蜀作劔閣銘益州刺史張敏見其文乃  
表天子刻石於劔閣焉又有小劔山在西北三十里  
故此爲大劔崔鴻十六國春秋苻堅使楊安伐蜀其  
將徐成破二劔是也東連莎鼻西接綿州凡二百三  
十一里故左太冲云緣以劔閣 碑目云劔閣有  
魏太尉鄧公神廟記唐劔州刺史邢丹題又鄧衛聖  
侯碑唐刺史郭淮立石又有唐李復撰劔閣碑唐魯  
叔明劔門記真元二年張允書唐劔門制置記廣明

元年立俱在棄繻亭南百步 寰宇記云隋始州銘  
在劔門縣二十里許有古州基自縣至彼攀木緣壁  
至此稍平一豐碑字名磨滅開皇三年李德林文士  
人謂之劔門縣蓋隋時以此爲始州也 唐書元和  
元年令狐楚賀收劔門表云臣得上都進奏院官高  
振報嚴礪下告捷官嚴公貺奏正月二十三日收復  
劔門破賊五千斬僞授劔州刺史武德昭訖 碑目  
云唐韋表微劔閣銘在報國寺靈泉側昔唐僖宗巡  
幸至此有微恙飲其泉頓愈因名爲報國靈泉今有  
石刻存焉 又云唐清義何氏古碑在劔門縣登高



臺光宅中建所載有名幕者生四子孝弟義遜家八十口不異居儀鳳二年敕賜清義門 又云劔門有修關石刻天成五年立又有五代敕牒甚多皆天成長興廣政間刻 方輿勝覽云有玉女臺在大劔絕頂峭壁千仞下瞰古道行人如蟻有小石刻云玉女煉丹之所 又有仙女觀圖經云在北岷頂唐先天二年置去觀一里渡仙女橋有煉丹臺岩畔有仙女影近代以來改爲禪院 有誌公殿劉焯記云劔閣之下有壽聖寺在石壁之西偏由益昌道中望之隱隱如行僧頂伽帽每秋時出或見光景陸游劔南詩

藁云劔門東石壁間影有若僧負杖者杖端彷彿有刀尺拂子狀 有梁山寺產茶亦爲蜀中奇品東坡南行錄詩有飛簷如劔寺之句其註云出劔門東望有一寺山巔樓閣隱隱可見有一二碑皆磨滅故唐碑也 有龍巖洞穴幽邃雨雪壅小說云王建爲盜朝廷捕之急逃於劔門巨石穴中卽此洞口宋人隸書龍岩二字有思賢樓在水門上畫張孟陽李太白杜子美柳子厚像 有文焰堂本記云按劔門題詩以太白子美爲重而世未有並祠之者會從李參預壁所得所賜阜陵御書蜀道難又從李左史得趙忠

定汝愚大書劔門詩因建祠刻二詩于側榜其堂曰  
文焰取韓退之詩語也 按晉張載劔閣銘云巖  
巖梁山積石峩峩遠屬荆衡近綴岷嶓南通邛夔北  
達褒斜狹過彭碣高踰嵩華惟蜀之門作固作鎮是  
曰劔閣壁立千仞窮地之險極路之峻世濁則逆道  
清斯順閉由往漢開自有晉秦得百二并吞諸侯齊  
得十二田生獻籌矧茲狹隘土之外區一人荷戟萬  
夫趨趨形勝之地匪親勿居昔在武侯中流而喜山  
河之固見屈吳起興實在德險亦難恃洞庭孟門二  
國不祀自古迄今天命不易憑阻作昏鮮不敗績公

孫旣沒劉氏啣璧覆車之軌無或重跡勒銘山阿敢  
告梁益 柳宗元劔閣銘曰井絡坤垠師以饒足喋  
血誓士玄機在握分命貌貅陳爲犄角右逾岷山左  
直劔門攻出九地上披重雲攀天踏空夷視阻艱破  
裂層壘殄殲群頑內獲固圉外臨平原天兵徐驅卒  
乘擘擘大憝囚戮戎夏咸歡帝圖厥功惟梁是先開  
國進位南服于藩邦之清奠人以完安銘功鑒亂永  
代是觀 歐陽詹劔門棧道銘云天覆地燾本亦備  
設大象難全或漏或缺損多益寡聖賢代工彼雖有  
缺與無缺同惟北曰秦惟南則蜀地缺其間坤維不

蜀中名勝記 卷二十六  
續斗起斷岸屹爲兩區秦人路絕蜀火煙孤天實不通賢斯有造鑽堅剡勁無蹊以道若川匪舟若陸非車緣危轉虛步驟交如構雖在功存亦由德項佛劉怒從完以踣隋落我榮自顛而植地非革勢材不易林踣植之致惠怨之心勿謂斯道不常勿謂斯道可久禮不以禮可有而無恭不以恭可無而有創之意如彼固之之理若茲彼知不易茲而易知勒銘道左其同我思 李文饒集劍門銘註云劍門當中有 一重峻嶺橫峙望若巨屏此一峰最奇而說者未嘗及也故銘云羣山西來波積雲屯地險所會斯爲蜀

門層岑峻壁森若戈戟萬壑奔東雙飛高闕翠嶺中橫黯然黛色樹若雄屏以衛王國 梁張怱蜀道難詩云梁山鎮地險積石阻雲端深谷下寥廓層巖上鬱盤飛梁駕絕頂棧道接危巒攬轡獨長息方知斯路難唐元宗巡狩言歸駐蹕劍門詩云劍閣橫空峻鸞輿出狩回翠屏千仞合丹嶂五丁開灌水縈旗轉仙雲拂馬來乘時方在德嗟爾勒銘才王勃普安建陰題壁云江漢深無極梁岷不可攀山川雲霧裏遊子幾時還盧照隣大劍送別劉右史云金碧禺山遠關梁蜀道難相逢屬晚歲相送動征鞍地咽綿川冷

蜀中名勝記 卷二十一  
雲凝劍閣寒倘逢忠孝所爲道憶長安李順送張諲  
入蜀云出門便爲客惘然悲徒御四海維一身茫茫  
欲何去經山復歷水百恨將千慮劍閣望梁州是君  
斷腸處孤雲傷客心落日感君深夢裏蒹葭渚天邊  
橘柚林蜀江流不測蜀路險難尋木有相思號猿多  
愁苦音莫向禺山隱禺山地非近故鄉可歸來眼見  
芳菲盡岑參入劍門寄杜楊二郎中云不知造化初  
此山誰開坼雙崖倚天立萬仞從地劈雲飛不到頂  
鳥去難過壁速駕畏巖傾單行愁路窄平明地仍黑  
亭午日暫赤凜凜三伏寒巉巉五丁迹與時忽開闢

作固或順逆磅礴跨岷峨巍蟠限蠻貊星當背參分  
地處西南僻陡覺煙景殊杳將華夏隔劉氏昔顛覆  
公孫會敗績始知德不修恃此險何益相公總師旅  
遠近罷金革杜母來何遲蜀人應更惜暫回丹青慮  
少用開濟策二友華省郎俱爲幕中客良籌佐戎律  
精理皆碩畫高文出詩騷奧學窮討蹟聖朝無外戶  
寰宇被德澤四海今一家徒然劍門石杜甫劍門詩  
云惟天有設險劍門天下壯連山抱西南石角皆北  
向兩巖崇墉倚刻畫城郭狀一夫怒臨關百萬未可  
傍珠玉走中原岷峨氣悽愴三皇五帝前雞犬莫相

蜀中名勝記 卷二十六  
放後王尚柔遠職貢道已喪至今英雄人高視見霸王并吞與割據極力不相讓吾將罪真宰意欲鐘疊嶂恐此復偶然臨風默惆悵王維送崔五太守云長安廡吏來到門朱文露網動行軒黃花縣西九折坂玉樹宮南五丈原褒斜谷中不容幘唯有白雲當露冕子午山裏杜鵑啼嘉陵水頭行客飯劍門忽斷蜀川開萬井雙流滿眼來霧中遠樹刀州出天際澄江巴字迴使君年紀三十餘少年白哲專城居欲持畫省郎官筆回與臨邛父老書李白蜀道難云噫吁戲危乎高哉蜀道之難難于上青天蠶叢及魚鳧開國

何茫然爾來四萬八千歲始與秦塞通人煙西當太白有鳥道可以橫絕峨眉巔地崩山摧壯士死然後天梯石棧相鉤連上有六龍回日之高標下有衝波逆折之迴川黃鶴之飛尙不得過猿猱欲度愁攀緣青泥何盤盤百步九折縈巖巒捫參厯井仰脇息以手撫膺坐長嘆問君西遊何時還畏途巉巖不可攀但見悲鳥號古木雄飛雌從繞林間又聞子規啼夜月愁空山蜀道之難難於上青天使人聽此凋朱顏連峰去天不盈尺枯松倒挂倚絕壁飛湍瀑流爭喧豨砢崖轉石萬壑雷其險也如此嗟爾遠道之人胡

蜀中名勝記 卷二十一  
爲乎來哉劍閣崢嶸而崔嵬一夫當關萬夫莫開所  
守或匪親化爲狼與豺朝避猛虎夕避長蛇磨牙吮  
血殺人如麻錦城雖云樂不如早還家蜀道之難難  
于上青天側身西望長咨嗟孫逖送靳十五侍御使  
蜀云天使出霜臺行人擇吏才傳車春色送離興夕  
陽催驛遠巴江轉關迎劍道開西南一何幸前後二  
龍來張喬送蜀客云劍閣緣空去西南第幾州丹霄  
行客語明月杜鵑愁露帶山花落雲隨野水流相如  
曾醉地莫滯少年遊李端送鄭宥入蜀迎覲云宥親  
西陟險君去異王陽在世誰非客還家卽是鄉劍門

千轉盡巴字一支長請語愁猿道無煩促淚行李德  
裕題劍門云奇峰百仞懸清眺出嵐烟迥若戈回日  
高疑劍倚天參差霞壁聳合沓翠屏連想是三刀夢  
森然在目前戎昱入劍門云劍門兵革後萬事盡堪  
悲烏鼠無巢穴兒童話別離山川同昔日荆棘是今  
時征戰何年定家家有畫旗許棠送張員外西川從  
事云爲郎不入朝自是赴嘉招豸角初離首金章已  
在腰劍橫陰綠野棧響近丹青迎駟應相續懸愁去  
路遙願非熊送李廊侍御赴劍南云鳥道見狼烟元  
戎正急賢圖書借朋友吟咏入戈鋌山色城池近江

聲鼓角連不應誇戰勝知在檄蠻篇李商隱題劍門  
寄上西蜀司徒杜公云峭壁橫空限一隅劃開元氣  
建洪樞梯航百貨通邦計鍵閉諸蠻屏帝都西蹙犬  
戎威北狄南吞荆郢制東吳千年管鑰誰鎔範只自  
先天造化爐楊凝送客入蜀云劍閣迢迢夢想間行  
人歸路繞梁山明朝騎馬搖鞭去秋雨槐花子午關  
于邵送穆司法赴劍亭序云決曹掾穆侯理行歸于  
劍十月寒矣艱哉是行休于嘉陵之陽日與樵牧爲  
伍而吾子言涉江水至于室廬告輟之期不遠千里  
然則取諸羽翮擊彼風水時之來也鳴可驚人而愛

親之道敬養爲切安得擇仕而以三語爲屈哉東江  
劍門又足助興地氣初閉河風稍嚴青冥爲空黃落  
向盡感物論別者庶存乎歌詩其二云人謂穆子通  
於理者也衰然作掾榮問所致故隴之下清風可挹  
人能盡驩邵真知勉矣頃以令弟仕于劍太夫人就  
養適乎道遠雖迫王事心馳倚閭朝辭府庭夕次郊郭  
不俟高駕拂衣而南羣公錫類詎敢留心各以壺酒  
垂楊好陰金秋始交火雲猶赫指日獻壽在原增光  
送君遂行千萬無盡 劍門東南有七盤嶺曰山  
曲折而七盤也方輿云武連縣在七盤山下按武連

縣舊爲武功縣故郭璞識云縣路翠武功貴縣路青  
武功榮其後青城何琰宰是邑遂刻石于縣門志云  
逍遙樓廢址在武連舊縣唐顏真卿書扁三大字碑  
刻在焉元改武連縣學爲魏公書院以唐魏徵所生  
之地也學正王惠爲之記 有靈泉劍南詩藁云過  
武連縣北柳池安國院有二泉傳云唐僖宗幸蜀至  
此飲之而甘賜名報國靈泉其詩云滴瀝珠璣翠壁  
間異時曾得奉龍顏欄傾螿缺無人管滿院松風晝  
掩關卽此 有都竹水寰宇記都竹水從武連縣流  
入普安縣南流至掌天山下入閬州益州記云掌天

山在臨津縣山多柘堪爲良弓雖麋絲燕角不能勝  
也志云柘溪水出柘谷山多生柘木 有下辯城寰  
宇記廢下辯城卽臨小潼溪李膺益州記云宋元嘉  
二十九年以武都流人于下辯縣安置大明二年改  
爲武連縣寰宇記小潼溪發源京兆山分水嶺謂之  
京兆水 本志云武連縣九龍山有洞石壁如屋  
內有九井 又云羣仙洞在武連縣洞中無他物惟  
石窟數間如堂宇有水自西向東不知所來山下長  
老云曾有數人耘苗見洞中樂聲嘹亮密覘於洞口  
見列坐如天人狀奏樂者無數欲進前觀之卽不見



自後人數見焉因名爲羣仙洞按武連下辯二縣皆因秦人僑置者 劍之西南有黃安縣晉置宋改爲普成縣縣在跨鶴山一名駕空山山腹有紫霄觀崖上有僧懷素草書多缺落不可辨跋云右懷素草字絳臺潘氏載入法帖誤綴張長史書末今潘氏墨本不可多得因刊于駕空山崖石與伯英草聖並列共傳承久隆興元年癸未季冬濃洞野叟識 志云城南百二十里有漢王潭在黃安縣之東境上有漢王廟 又云普成縣南一里紫霄觀舊名普成晉宋間有李隱君名普成者煉形其間與其弟普露普濟白

日昇去是普成縣以仙名也縣傍有石麒麟每天旱土人諷經取水洗之卽雨 又南八十里有義津卽古臨津縣地碑目唐盧照鄰悟本寺記在故臨津縣悟本寺內

梓潼縣

水經曰梓潼水出其縣北界西南入於涪註云故廣漢郡也公孫述改爲梓潼郡劉備嘉霍峻守葭萌之功又分廣漢以北別爲梓潼郡以峻爲守焉王勃梓潼南江泛舟序云咸亨二年六月癸巳梓潼縣令韋君以清湛幽凝鎮流靖俗境內無事艤舟于江潭縱

蜀中名勝記 卷二十一  
觀于丘壑渺然有山林陂澤之思遂長懷悠想周覽  
極睇思其人則呂望藉茅于磻溪之陰屈平製芰于  
涔陽之浦覺瀛洲方丈森然在目于是間以投壺讐  
以妙論亦有嘉餽旨酒明絃朗笛以補尋幽之致焉  
預于斯者若干人 唐書天寶之亂左拾遺房瑄獨  
馳蜀路至普安郡謁見玄宗與語大悅之即日拜吏  
部尚書門下平章事復次梓潼寰宇記云明皇過梓  
潼望見山上有一窟近臣奏云漢司馬相如讀書之  
窟遂勅名爲長卿山 志云山上有長卿寺下有漢  
侍御史李業石闕舊經云前漢侍御史李業葬此遭

赤眉亂二關以臨關俱破壞志又云縣東北有二石  
闕其一題曰漢沛國相范伯友墓其一題曰漢趙相  
國雍輔君之墓 宋周必大曰予得光武時梓潼扈  
君墓輒先敘所歷之官末云千秋之闕模脫隸書而  
非鐫 搜神記云有神姓張名亞道術顯著廟在  
梓潼玄宗幸蜀著靈追封左丞相唐書廣明二年僖  
宗幸蜀神又見于利州桔柏津封爲濟順王親幸其  
廟解劍以贈神 郡國記云濟順王本張亞子戰死  
而廟存昔亞子西至長安見姚萇謂曰却後九年君  
當入蜀若至梓潼七曲山幸當見尋至建元十二年

長隨楊安南伐將至七曲迷道遊騎賈君蒙忽見一鹿馳去逐至廟門鹿自死追騎共剝之有頃長至悟曰此是張君爲我設主客之禮烹食而去按此卽世所奉祀梓潼帝君也唐判度支蕭遘和王鐸作張亞子廟詩云青骨祀吳誰讓德紫華居越亦知名未聞一劍傳唐主長擁千山作蜀城斬馬威稜應掃蕩截蛟鋒刃俟昇平鄩侯爲國新簫鼓堂上神籌更布兵文同丹淵集出守陵州有祭梓潼神文梓潼又有百神廟在縣南四里咸通十一年盧耽除西川節度時蠻寇圍成都大將軍吳行魯統師過此見斷碑皆

古卿相之名默致禱焉旣而王師大捷乾符三年行魯除東川節度遂于路側置百神之廟景福大順間廟遭兵火王氏僭號夢神人求祠宇稱是梓潼百神因重興置又有五婦山在縣北十二里高四百二十丈按蜀記云梓潼縣有五婦山秦王遺蜀王美女五人蜀王遣五丁迎女至梓潼五丁蹋地大呼驚五女並化爲石蜀王築臺而望之不來因名爲五婦候臺漢書地理志云梓潼五婦山碑誌存有五婦神廟李膺又云梓潼有鳴湍折碑祠西臨潼水湍迅激流俗呼張湍祠亦呼爲石碑祠又有隱劍泉在五丁

力士廟西一十步古老云五丁開劍路迎秦女拔蛇  
 山摧五丁與秦女俱斃于此餘劍隱在路旁忽生一  
 泉又云此劍每庚申日現 又有蛟龍神祠在縣東  
 十九里兜鍪山上俗呼為兜鍪神古老相傳此神昔  
 用生人祭之不則瘴疾水潦為害張道陵戒之遂絕  
 又有葛山志云梓潼縣西南二十里葛山又名卧  
 龍相傳武侯伐魏駐兵于此見虎豹蛇蟲勢惡自卧  
 草中獸皆俯伏有古碑在此山之景福院

蜀中名勝記卷之二十六

蜀中名勝記卷之二十七

閩中曹學佺能始著

順慶府一 南充縣附郭

嘉陵江既遶當郡流則將滙巴岩之水而下墊江矣  
 華陽國志云劉璋分墊江以上為巴西郡者此也寰  
 宇記云嘉陵江在州東二百步自相如縣界流入南  
 充按十道記云果州左濱西漢水叢薄蔚然有相如  
 琴臺觀此則嘉陵江之為西漢水益明矣 韋應物  
 聽嘉陵江水寄深上人詩水性自云靜石中本無聲  
 如何兩相激電轉空山驚按長慶集云韋貫之坐考

策收直言者出爲果州刺史今嘉陵驛設于此者  
舊錄云自漢紀信以下三十六人並見學錄蒲士龍  
所編者舊而趙嗣業趙昌藻游問爲之贊此外隱逸  
王公宇以下十四人併繪像于郡之鄉賢堂又復搜  
訪王綰以下二十餘士悉繫于左 郡志云譙周墓  
在治後有碑今折 碑目云唐王維送楊長史赴果  
州詩刻在郡治其中聯云官橋祭酒客山木女郎祠  
唐詩三體註云漢法祭酒上客之稱女郎祠以謝自  
然上昇于果山按常璩云張魯以鬼道立教後乃爲  
祭酒巴漢夷民多便之則祭酒稱上客是矣謝自然

昇仙乃貞元間事在右丞後不應引此官橋者志云  
郡西三十五里有西橋舊名官橋也按女郎亦張魯  
女感孕而生龍者祠在漢中 碑目又云唐移縣碑  
在南充縣門大中年立文字磨滅不可詳辨二良牧  
碑馬肩孟撰載唐二刺史事碑在郡治醋庫之側永  
興節度使王彥超重建行成思堂石刻詩不著其姓  
今附見云作堂在姑孰把麾來果山男子四方志萬  
里如目前振振佳公子性行純如天旣知仁有本自  
應枝葉繁宣尼語參孝推廣十八篇君能擴充之九  
思極其全道行身亦立揚名顯其先回觀廬墓人卑

卑何足言方輿記云有仙鶴樓在郡城後子城上下  
瞰大江宋邵博詩春去秋來好風月鶴樓端勝庾公  
樓 郡之東南有開漢樓郡守楊濟記云聖朝褒綸  
有實開漢業之語因摘二字以名是樓按開漢樓詩  
序嘉陵大江襟帶於左金泉栖樂諸山雄峙于右宋  
忠祐廟誥詞云以忠殉國代君任患實開漢業使後  
世知君爲重身爲輕雖糜捐不避者侯有力焉之謂  
也 有清居山勝覽云在南充縣南唐姚昂詩天設  
兩峰南北峭地盤一水古今流內有四亭曰白雲光  
相吸江五友按五友亭宋游炳題明月清風爲道友

古典今文爲義友孤雲野鶴爲自在友怪石流水爲  
娛樂友山果芋栗爲相保友是五友者無須與不在  
此間也總志云金壘在清居山高與山等亭亭如浮  
圖常有光焰出焉 有清泉山方輿云城南十里有  
古刹下瞰龍門諸山寰宇記云龍城山盤屈如龍絕  
壁如城蜀志補遺卽龍角山道經以爲福地 有朱  
鳳山寰宇記在州南十里高百七十二丈周迴二十  
里昔有鳳凰集于此因置鳳山觀方輿云乃爾朱仙  
李淳風養煉之地迴視郡城如在掌握碑目云唐朱  
鳳山觀銘長史袁玘文 有漢充國城志云在府南

三十五里按充國漢永元二年分閬中置巴記曰初平四年復分爲南充國也邵博詩云山圍翠合水連雲萬室樓臺照眼明勝地風淳真樂國四州惟說好充城 有畫卦石志云在治東四十里其石平如砥上有八卦相傳周柱下史以足畫之足跡尙存 有大斗溪志云在治東八十里源出老君山與嘉陵江合旁有大石如斗 有都尉壩嘉陵志郡南五十里有都尉墓俗云都尉娘西充女子也代父戍以功授都尉歸爲嫂氏所嘲乃剖腹見肝腎以死葬鳳了山有豐碑社祀今廢其年代姓氏無攷墓前翁仲猶存

或云卽陳壽妻壽嘗爲騎都尉故人以稱其妻 西北有果山寰宇記在州西八里層峰秀起松柏生焉方輿云果山郡柑得名陳壽隱居于此有祠志云陳壽有萬卷樓在山之麓邵伯温果山卽事詩果山仙果秀天香處處圓金樹樹芳謂黃柑也志云果山書院在城北五里蜀譙周建後郡人邊速達以秘書監致仕歸隱于此藏書四千二百七十一冊碑刻爲至正八年 又云治北五里有譙周觀星臺一云是其故宅有碑存按華陽國志云譙侯修文于前陳君煥炳于後則此山之靈秀有自來矣 有金泉山方輿

云在城西果山之足唐書貞元十年謝真人名自然于縣界金泉紫極觀白日上昇郡郭是夕有虹霓雲氣萬目所共覩焉有青霞觀及真人祠韓愈詩果州南充縣寒女謝自然童駿無所識但聞有神仙輕生學其術乃在金泉山一朝坐空室雲霧生其間須臾自輕舉飄若風中煙入門無所見冠屣同蛻蟬施肩吾謝自然昇仙詩分明得道謝自然古來漫說尸解仙如花年少一女子身騎白鶴遊青天有步虛臺宋鄭芳庭詩云平生酷好退之詩謝女仙踪頗自疑不到步虛臺下看瓊笙玉佩有誰知有靈泉院碑目云

謝真人父諱寰所居名謝寰山山有院名靈泉一唐碑字多訛缺通志云靈泉卽金泉也唐李淳風于此藏金化爲泉宋江萬里書金泉二字于崖上碑目云唐金泉山仙居述太和五年果州刺史韋公肅文唐鄭餘慶詩刻唐誥刻僞蜀刺史徐光溥詩刻俱在金泉山李宏遊金泉觀詩云昔時謝女昇天處此日遺蹤尙宛然蟬蛻舊衣留石室龍飛勝地湧金泉碑書故事封蒼蘚殿寫眞容鑱翠煙薄暮松巔聽鶴唳猶疑彷彿下神仙 有寶臺山在城西與金泉對峙有覽秀亭呂好問覽秀亭記思史實之遺風弔譙陳之



舊蹟想程謝之仙踪慕張閻之英躅謂史謙恕竇泌  
譙周陳壽程太虛謝自然張嶷閻纘也 有舞鳳山  
志云西北八里舞鳳山三字乃宋人隸刻石 有栖  
樂山志云在西十里相傳謝自然昇天之日仙樂振  
響峰頂故名有栖樂池在山頂登之以石泉水清潔  
與嘉陵江相通 有安漢城志云在府城北三十五  
里漢地里志云有魚池在南莽曰安新 劉宋于此  
置宕渠郡又云宕渠城在府城北四十里卽石苟壩  
城也 有大方山方輿云城北十五里通志云城西  
三十里又有小方山一峰萬嶺儼若洞天其上有滴

乳泉道士何志全飲此水年老面如桃紅樊汝賢詩  
雲液落山腹脈與崑崙通云何山中叟八十桃顏紅  
卽今之乳泉舖也 有昆井益州記云南充縣西六  
十里有大昆井卽古之鹽井 有大眈山與小眈山  
相對志云西百里大眈山隋楊昉修道于此因名  
名賢馬鬣有晉譙秀墓按秀譙周之孫隱居不仕躬  
耕山藪李雄徵之不應晉王逸少書云聞譙周有孫  
其人高尚不仕可得見否唐李商隱詩欲向巴西覓  
譙秀巴西惟是有寒蕪 有馮休墓方輿云南充人  
眞宗朝不應辟召歸山著書 有何涉墓志云在疏

瑯山下按涉讀書博古著作甚富明道雜志載其爲  
司馬溫公所推重 有游仲鴻墓後漢劉光祖表其  
道曰於乎慶元黨人游公之墓 有趙夫子墓在據  
德里鄉人稱趙巽也 予遍閱唐人集元稹嘉陵江  
詩秦人惟識秦中水長想吳江與蜀江今日嘉川驛  
樓下可憐明練繞明窗其二云千里嘉陵江水深何  
年重繞此江行只應添得清宵夢時見滿江秋月明  
微之又宿嘉陵驛詩嘉陵驛上空牀客一夜嘉陵江  
水聲仍對牆南滿山樹野花撩亂月櫳明其二云牆  
外花枝壓短牆月明還照半張牀無人會得此時意

一夜獨眠西畔廊白居易嘉陵夜有懷詩露濕牆花  
春意深西廊月上半牀陰憐君獨卧無言語惟我知  
君此夜心其二云不明不暗朦朧月非暖非寒慢慢  
風獨卧空牀好天氣平明閒事到心中武元衡題嘉  
陵驛詩悠悠風旆繞山川山驛空濛雨似烟路半嘉  
陵頭已白蜀門西更上青天歐陽詹聞嘉陵越鳥聲  
呈林蘊詩正是閩中越鳥聲幾回留聽暗霑纓傷心  
激念君深淺共有離鄉萬里情陸龜蒙宿嘉陵館樓  
詩離思茫茫偏值夜每因風景却生愁今宵難作刀  
州夢月色江聲共一樓李洞將之蜀別友人詩嘉陵

雨色清澹別酌參苓到蜀高諸岳窺天合四溟書來  
應隔雪夢覺已無星若遇多吟友何妨勘竺經薛能  
嘉陵驛詩江濤千疊閣千層銜尾相隨盡室登稠樹  
蔽山聞杜宇午烟熏日食嘉陵頰題石上程多緩暫  
歇泉邊起不能如此幸非名利切益州來日合携僧  
劉滄春日遊嘉陵江詩獨泛扁舟映綠楊嘉陵江水  
色蒼蒼行看芳草故鄉遠坐對落花春日長曲岍危  
檣移渡影暮天栖鳥入山光今來誰識東歸意把酒  
閒吟思洛陽右嘉陵水閬中廣元皆得稱之雖不知  
所指然今驛設在果州故弁及之

西充縣

始析南充後乃併流溪而有之仙踪古跡特著其大  
陵鎮則有扶龍山志在高陽之扶龍村蓋紀信此縣  
人祠在紫崖其小陵鎮則有肖巖石竇空潤泉水清  
潔 唐盧藏用弔紀信文曰皇綱圯兮帝紐頹王風  
悲兮霸道衰天運促兮周以覆秦德棄兮漢業開何  
項王之最屢作驅除于雲雷豈淵海之飛盪資拔山  
之偉才于是左契歸楚羣雄奉職皇矣漢祖獨負其  
直矧滎陽之圍城兮旣孤而迫偉將軍之天誘兮矯  
奪其識彼見危而授命兮亦各有時考振古以爲觀

兮罔恢帝基感將軍之墳隧兮壯大義之在茲仰前  
修以砥節顧車迴而馬遲嗚呼身旣焚兮業旣昌楚  
歌絕兮漢道光君不旌兮史不揚功不錄兮歿不傷  
奄孤墳以載葬抑千祀而爲荒皇周敷訓兮澤及枯  
齒伊予寡德兮忝宰茲地奉宣嘉猷兮懼尸厥位思  
將軍兮允忠且義託神交于萬古兮實獲心志乃斲  
石于他山兮式幽墳以昭賁詞曰攝提貞歲兮奉揚  
仁風跋涉草莽兮詞弔紀公善彼勇兮殺身爲忠九  
原不作兮予將焉同金石刻名兮千萬歲魂魄光烈  
兮爲鬼雄 南岷山則有九井十三峰漢何岷之所

隱也隋程太虛嘗修煉于此志云太虛自幼好道精  
修勤苦隱居南岷山絕粒有二虎侍左右九井十三  
峰皆其修煉處一夕大風雨砌下得碧玉印居人每  
祈符祈年印以授之輒獲豐稔唐元和中解體後遷  
神于元宮容貌不變宣宗命人求之使者過商山宿  
逆旅躡險有居第如公館青童引見一道士自稱程  
太虛祖居西充且囑曰明歲君自蜀入南岷山無忘  
我及至蜀熟是畫像與前見者無異宋賜號道濟太  
師碑目云唐程仙師蟬蛻偈皂莢碑唐仙林觀碑中  
書侍郎趙彥照撰俱在本山之降眞觀 流溪縣則

有鐵冠仙人鈐記云大洲連小洲此地出公侯 有  
漢車騎崖石刻郡國志云後漢車騎將軍馮緄于此  
鐫崖刻石十有餘處寰宇記云在流溪縣按金石錄  
云右漢車騎將軍馮緄碑以范曄後漢書攷之史云  
字鴻卿而碑云皇卿史云初舉孝廉七遷至廣漢屬  
國都尉拜御史中丞順帝末持節揚州諸軍事與中  
郎將滕撫擊破羣賊今據碑自舉孝廉至爲廣漢屬  
國都尉凡十一遷而爲中丞與都使徐揚二州討賊  
皆在爲都尉前碑云討賊時坐迫州縣正法而史不  
載又云爲隴西太守坐問吏辜旬不分去官以兇駭

動爲四府所表復家拜隴西太守而史但言遷隴西  
太守史云爲遼東太守徵拜京兆尹轉司隸校尉遷  
廷尉太常拜車騎將軍以碑考之緄爲遼東太守以  
前常爲治書侍御史遷尙書遂爲廷尉未嘗拜京兆  
尹及司隸也史云振旅還京師監軍使者張敞承宦  
者旨奏緄會長沙賊復起攻桂陽武陵緄以軍還盜  
賊復發策免而碑云臨當受封以謠言奏河內太守  
中常侍左悺弟坐遜位史云復拜廷尉時山陽太守  
單遷以罪繫獄緄拷致其死遷故車騎將軍超之弟  
中官相黨遂共誹章誣緄坐輸左校而碑云表荊州

刺史李隗南陽太守成晉太原太守劉瑱不宜以重論坐法作左校亦皆不合史又云爲河南尹時上言舊典中官子弟不得爲牧人職帝不納拜屯騎將軍復爲廷尉卒于官而碑云復廷尉奏中官子弟不宜典牧州郡獲過左右遜位永康元年薨亦當以碑爲正碑又云緄謚曰桓而史亦不載余嘗謂石刻當時所書其名字官爵不應差誤可信無疑至于善惡大節則當以史氏爲據今此傳首尾顛倒錯謬如此然則史之所載是非褒貶失其實者多矣果可盡信耶又云右漢馮使君墓闕銘云故尙書侍郎河南京

兆豫州刺史馮使君神道按後漢書馮緄父煥安帝時爲幽州刺史而緄碑亦云幽州君之元子此字在宕渠緄墓前雙石闕上知其爲煥闕也

卷二十一

此處有被損壞的書頁，可見部分文字。右側有兩條垂直的界線，將文字框定在一個區域內。文字內容因損壞而模糊不清，但依稀可辨為垂直排列的漢字。

